



Diaranson 18 Januari 2023


Email: IslaOnline@gobierno.aw Tel: 528-4952

ISLA ONLINE

Noticia di Gobierno

2023





Riba su prome dia di bishita na scolnan en conexion cu Dia di Betico: **PROME MINISTER A BISHITA PRINSES AMALIA BASISSCHOOL**

'Danki pa stima nos pais' ta e tema di e aña aki



Muchanan di Prinses Amalia Basisschool tawata entusiasma wardando riba bishita di Prome Minister Evelyn Wever-Croes na nan scol. Manera e añanan anterior durante e siman di celebracion di Dia di Betico, Prome Minister lo ta bishitando diferente scol na Aruba pa mira con scolnan ta preparando pa e dia aki. Diaranson 18 di januari mainta, Prome Minister a bishita Prinses Amalia Basisschool pa asina e mes por conta e muchanan e historia, bida y logro di e gran luchador di nos Status Aparte, Gilberto François 'Betico Croes'.

E tema cu a wordo trata e aña aki pa Gobierno di Aruba ta 'Danki pa stima nos pais'. Ta e stimacion aki di Betico pa nos pais, den union cu pueblo di Aruba y e curason di positivismo di cada ciudadano, tawata e motor pa Aruba logra Status Aparte na e momento apropiado.

Prome Minister a comparti hopi informacion tocante di e historia di bida y trabou di e gran Lider y Libertador Betico Croes cu alumnonan di klasnan 5 di e scol. Muchanan a ricibi un flyer

cu preguntanan tocante Betico cu tawata un manera pa habri topiconan interesante tocante e gran Arubiano Betico Croes.

E klasnan tawata hopi bon prepara y e muchanan a demostra cu ya caba nan tin hopi conocimiento di e storia di Betico Croes. "Esaki ta algo cu ta yena mi cu hopi orguyo y placer di sa cu nos muchanan sa ken ta Betico. Esaki ta e responsabilidad di mas grandi di nos generacion pa traspasa na nos muchanan ken ta Betico, kico Betico a haci pa nos, su lucha, bida y principalmente su sacrificio cu awe nos ta biba den un pais liber. Ta importante cu nos muchanan por sigui carga no solamente e celebracion di Dia di Betico, pero tambe e ideologia y cu tur wordo inspira, pa den union y positivismo, nan tambe logra cosnan grandi pa Aruba", Prome Minister a expresa.

Prome Minister ta gradici Prinses Amalia Basisschool, Cabesante Juffrouw Roelin Hofman, Juffrouwnan Gina y Remy di klasnan 5a y 5b, demas docente pa e ricibimento cordial y ameno na e scol.

Continuacion **PROME MINISTER A BISHITA PRINSES AMALIA BASISCHOOL....**



Prome Minister Evelyn Wever-Croes: En conexion cu su bishitanan na scolnan den e siman di celebracion di Dia di Betico:

PROME MINISTER A BISHITA DOMINICUSCOLLEGE BASISSCHOOL



Un tradicion bunita di tur aña di Prome Minister Evelyn Wever-Croes y Ministernan di Gabinete Wever-Croes ta pa bishita scolnan rond di Aruba den e siman di celebracion di Dia di Betico. Prome Minister ta bishitando e dlanan aki algun scol basico no solamente pa haya e oportunidad pa conta nos muchanan tocante e bida y logronan di Betico Croes sino tambe pa biba e entusiasmo y alegria cu nos muchanan pa cu nos gran Betico Croes.

Tur alumno di Dominicuscollege Basisschool a ricibi Prome Minister cu banderín den man y nan alegria y entusiasmo tawata refleha riba nan caranan contento. Prome Minister a dirigi palabranan na e muchanan enfatisando e importancia pa como Arubiano nos sigui celebra Dia di Betico y mas ainda conoce e ideologia y logronan di e gran Arubiano aki. Despues di e recibimento bunita aki, Prome Minister a bishita klas 5 y klas 6 na unda Juffrouwnan Rachelle Wever y Luanne Eman hunto cu alumnonan a ricibi Prome Minister.

“Alumnonan di Dominicuscollege Basisschool ta hopi bon prepara den conocimiento di bida di Betico, un persona comun y coriente cu tawata tin un gran soño pa nos pais. Y ohala cu e storia di Betico Croes inspira tur mucha y pa nan realisa cu cada un tin un pida di Betico den nan pa logra cosnan hopi grandi pa Aruba, den union cu cada ciudadano y cu e mesun positivismo cu Betico tawatin”, Prome Minister a expresa.

Prome Minister ta gradici Dominicuscollege Basisschool, Cablesante Juffrouw Caroline Cardose y demas docente pa e forma cordial y bunita cu e scol a ricibi’e diaranson 18 di januari mainta.



Continuacion PROME MINISTER A BISHITA DOMINICUSCOLLEGE BASISSCHOOL....



Premier Evelyn Wever - Croes:

A CERA ACUERDO PA REALISA PROYECTO EMBEYECIMIENTO EAGLE BEACH CUAL TA HOPI AMPLIO Y TA ENCERA DIFERENTE PROYECTO



a conoce un sin fin di actividad, tanto concierto como tur tipo di deporte. E actividadnan aki na dado momento tin nan influencia riba e calidad di e santo. Esey ta un hecho inevitabel. Ta pesey a hacie un prioridad pa drecha esey, y despues di e inversion den santo nobo, e beach a keda hopi bunita. Den revistanan internacional Eagle Beach pa hopi aña ya caba ta aparece den e top beachnan na mundo. Pa un isla chikito manera Aruba, cu tin hopi competencia riba e tereno aki, esey ta un reconocimiento sumamente grandi di cual nos tur mester super orguyoso. A pesar di esey, awor a yega e momento pa di un forma structura, dedica atencion na e area aki.

Prome Minister Evelyn Wever - Croes a hiba palabra na e ocasion di acuerdo pa inicia cu Proyecto Embeyecimiento di Eagle Beach. Na e ocasion Prome Minister Wever - Croes a expresa cu aña pasa na ocasion di Revelacion di e Logo Nobo di TPEF a repasa e metanan di TPEF. Na e ocasion ey a bisa entre otro: "E producto cu Aruba ta ofrece ta resultado di un labor di amor; un sinergia constante y continuo di tur e actornan cu tin e producto Aruba na pecho". Desde e momento ey te cu awe ya caba diferente proyecto a wordo realisa of ta den via di realizacion pa TPEF. Esaki ta e ultimo riba e lista cu ta hopi amplio di proyectonan cu tin cu wordo realisa ainda.

Ken no conoce nos precioso Eagle Beach. Di mucha hopi persona ta bin na e beach aki pa pasa un dia relajante cu famia, amigo y conocinan. Durante añanan cu a bin ta pasa a wak hopi cambio riba e strip aki. E cantidad di persona, tanto local como turista, a crece drasticamente. Edificio y hotelnan a wordo traha na otro banda di e boulevard y den e ultimo añanan a conoce e fenomeno di condominio. Tabata tin un temporada cu Eagle Beach tabata e Mecca di windsurfing. Ta corda tambe con e boulevard pariba di e beach cu tabata di dobel via tabata congestionna cu auto na ocasionnan special. Eagle Beach pa añanan largo tabata e luga ideal pa famianan campa den tempo di cuaresma. Contrario na e otro beachnan mas panort di Eagle Beach, e ta un beach cu ta bira hundo basta lihe. E otronan ta keda seco pa distancia largo for di costa mientras bo ta completamente safe. E fenomeno aki tabata conoci y tur hende tabata avisa bo cu si bo ta bay landa na Eagle Beach bo mester a haci esaki cu e cautela necesario. Eagle Beach

LOCUAL E PROYECTO TA ENCERA

E proyecto di embeyecimiento di Eagle Beach ta un inversion di TPEF como trekker. Na aña 2022 a pone 1 miyon florin disponibel y pa e aña 2023 lo pone un suma adicional di 500 mil florin. Lo inverti mas cu 200 mil den recipiente pa colecta sushi. E total inversion ta di 1.7 miyon florin di sector publico. ATA tambe ta contribui cu 385 mil florin. E proyecto ta encera embeyecimiento di e area dunando e strip un bista uniforme cu mata y vegetacion, drecha banda di caminda y pone piedra blanco for di rotonde di Amsterdam Manor te cu rotonde di Alhambra. E recipientenan pa colecta sushi tin como meta contribui na maneha sushi di un forma mas eficiente. Haciendo e recipientenan aki visibel y accesibel bo ta incentiva e usarionan di e Eagle Beach pa deposita nan sushi den esakinan, contribuyendo asina na tene e luga limpi. E Proyecto di Embeyecimiento di Eagle Beach ta un "private-public collaboration" na unda gobierno pa medio di TPEF y ATA ta inverti y propietarionan di e diferente edificionan na Eagle Beach ta percura pa e mantencionnan necesario. Trahando den union y contribuyendo asina cu e inversion cu gobierno ta haci ta keda den bon estado, elevando asina mas ainda e producto turistico Aruba.

Prome Minister Wever - Croes ta gradici colega Minister di Turismo Dangui Oduber, sra. Ronella Croes di ATA y sr. Mario Arends, presidente di TPEF, pa tur nan esfuerzo y trabou duro cual ta refleha e amor cu tin pa Aruba.

Continuacion A CERA ACUERDO PA REALISA PROYECTO EMBEYECIMENTO....



Prome Minister Evelyn Wever-Croes:

BETICO A UNI E PUEBLO Y CU POSITIVISMO A LUCHA PA ARUBA SU LIBERTAD, SU STATUS APARTE

“Sea bo ta catolico, protestant of di otro religion. Sea bo ta blanco, preto, of geel, sea bo ta pover of rico, sea bo ta di Playa, Sta.Cruz, Noord of Sanicolas, bo ta Arubiano, bo ta pertenece na e pida baranca cu yama Aruba”.

Gilberto François Croes, miho conoci como Betico Croes, di mucha caba a demostra cualidadnan di bira un lider. Semper yudando esnan rond di dje y duna guia na esnan cu tawata tin mester di dje. Cualidad cu a sigui manifesta den e dianan di su hubentud y a brota como adulto. Betico tawata carismatico y tawata influencia y inspira tur esnan su rond. Hopi hende a expresa cu Betico Croes a nace un lider. Pero e realidad ta, cu ta e determinacion cu Betico tawata tin pa lucha pa libertad di su pueblo, a conberti’e den e gran lider cu el a bira, stima pa tur. Betico, den union cu e pueblo di Aruba y cu hopi positivismo, a lucha pa cada meta cu el a propone.

Betico a destaca den su lucha ferviente pa trece union bao di tur ciudadano di Aruba, sin importa rasa, color, religion etc. Betico tawatin e meta pa caba cu tur segregacion y division cu tabata existi riba e isla aki. Sin duda cu e union aki tabata determinante pa por realisa e causa di e pueblo Arubano, esta nos Status Aparte.

Pueblo di Aruba a cuminsa realisa e abilidad y cualidad di un gran lider den Betico Croes, kende tawata posee conocimiento amplio di politica. Betico a sa di uni e pueblo Arubiano cu no a exclui niun hende pa cua motibo tambe, el a bira e lider mas stima den su tempo.

Palabranan cu Betico a expresa y a demostra cu accion, a keda graba pa semper: “Sea bo ta catolico, protestant of di otro religion. Sea bo ta blanco, preto, of geel, sea bo ta pover of rico, sea bo ta di Playa, Sta.Cruz, Noord of Sanicolas, bo ta Arubiano, bo ta pertenece na e pida baranca cu yama Aruba”.

Betico ta un lider cu pueblo a stima. Un lider cu a haci di Aruba un gran famia. Un lider cu a uni un pueblo. Den union y positivismo, Betico a lucha y a mantene determinacion incansabel pa realisa su meta pa duna Aruba su libertad, su Status Aparte.



Prome Minister Evelyn Wever-Croes, den nomber di Gobierno di Aruba ta invita pueblo henter, pa diaranson awo, 25 di januari, Dia di Betico, pa nos tur celebra e dia importante aki. Betico Croes a uni e pueblo y nos ta den temponan dificil na unda cu como un pueblo, nos mester keda den union y cu positivismo pa sigui den e recuperacion cu nos ta den.



**UNION A DEMOSTRA CON MAS FUERTE
NOS POR TA PA CARGA E EXITO DI NOS PAIS!**



MINISTER DI CULTURA TA PRESENTA DOS PROGRAMA INFORMATIVO TOCANTE UNESCO ARUBA



Den luna di november 2022 Unesco Aruba a conmemora 35 aña cu Aruba a bira miembro asocia di United Nations Educational Scientific and Cultural Organization, UNESCO.

UNESCO ta e organisacion di Nacionnan Uni cu ta traha riba tereno di educacion, ciencia, cultura, comunicacion y informacion. Pa alineá e trabounan di UNESCO pa Pais Aruba a institui un Comision Nacional pa UNESCO. Minister Xiomara Maduro ta informa cu pa prome biaha Aruba tin un Secretariado formalisa cu e posibilidad pa nombra un especialista pa cada un area di trabou di UNESCO.

Pa duna un bista con UNESCO Aruba ta funciona y con e ta implementa e programanan di UNESCO, e dignatario ta

presenta dos programa informativo na television tocante UNESCO Aruba. Den e prome programa e Secretario General di Comision Nacional UNESCO Aruba, sra. Marushka Tromp hunto cu e expertonan di e Secretariado lo hiba palabra. sra. Nora Eleonora, especialista di educacion, sr. Marck Oduber, especialista di ciencia, sra. Ruby Eckmeyer, especialista riba tereno di ultura lo duna un splicacion tocante e meta di tereno di experticio. Alabes sr. Peter Scholing, Presidente di 'Memory of the World' (Mowlac) lo brinda informacion tocante di e programa di Mowlac.

E mandatario ta informa cu e prome programa tocante UNESCO Aruba lo pasa diaranson dia 18 di januari, pa 7'or di anochi na Tele Aruba y 8'or di anochi na Diario TV.

Enconexion cu Celebracion Dia di Betico: CCDN TA INVITA HENTER FAMIA PA PARTICIPA NA KIBRA COCO RIBA CAYA DIADOMINGO 22 DI JANUARI

Comision Celebracion Dianan Nacional y Ministerio di Cultura ta organisa un otro edicion di Kibra Coco pero e biaha aki den un formato diferente di cual henter famia por participa y conoce luganan cu tin di haber cu e historia y lucha di nos libertador.

Kibra Coco riba caya lo ta den un forma di Car rally/ Scavenger hunt, participante mester ta pendiente di e programa special riba radio MAS 105.1 y Diario TV 48 pa haya sa e pistanan. Na momento cu e grupo yega na e sitio e mester busca e “barcode” cu ta scondi y aki mester uza nan celular pa scan e “barcode” y contesta e preguntanan mas rapido posibel. E gruponan cu contesta mas pregunta corecto den menos tempo ta gana e competencia. Lo tin premio pa grupo campeon, grupo miho uniforma y auto miho decora.

Diadomingo for di 10 or di mainta e programa special ta cuminsa, grupo mester ta maximo 5 persona 2 adulto y 3



mucha, inscripcion di e grupo ta tuma luga na momento cu nan scan e prome barcode na e prome pista.

Un danki special na Setar Aruba NV cu lo guia e proceso aki digitalmente.

MINISTER MADURO TABATA PRESENTE NA E LANSAMENTO DI E PROYECTO DI EMBEYECEMENTO DI E STRIP DI EAGLE BEACH Un bunita proyecto cu ta tipifica ‘union y positivismo’

Diamars cu a pasa, den presencia di diferente mandatario, parlamentario, stakeholders y demas invitado, Minister di Turismo, Dangui Oduber, hunto cu Minister President y representantenan di e hotelnan riba e hotelstrip di Eagle Beach, a firma un MOU pa asina cuminsa cu e proyecto pa embeyece e area di Eagle Beach.

E proyecto ta encera un colaboracion entre Fondo di Tourism Product Enhancement Fund (TPEF), Aruba Tourism Authority (ATA) hunto cu e hotelnan situa riba e strip di Eagle Beach, unda lo percura pa embeyece y mantene e area di Eagle Beach bunita pa tur usuario. TPEF y ATA lo financia e inversion y e hotelnan riba e strip cu ta cuminsa for di rotonde di Amsterdam Manor te cu e rotonde di Alhambra, lo percura pa e mantencion.

Minister di Finansa y Cultura, Xiomara Maduro, tabata presente pa asina presencia e firmamento aki cu a haci e proyecto uno oficial. ‘Sigur un bunita proyecto cual no solamente turistanan cu ta bishita nos isla lo disfruta, pero sigur tambe nos habitantenan lo sa di aprecia e embeyecemento aki. Esaki ta cuadra tambe cu nos lema pa cu e aña aki di union y positivismo caminda



cu bo ta wak con ora cu sector publico y priva uni, ta cosnan positivo ta sali for di e union aki’ tabata palabra di Minister Maduro na e ocasion aki.

E mandatario ta felicita Minister Dangui Oduber y ta gradici e board di TPEF, ATA y e hotelnan pa e bon colaboracion pa un proyecto na bienestar di Aruba.

MINISTER MADURO A REUNI CU E COMPANIA DI RATING STANDARD & POOR'S CU TA EVALUA ARUBA SU CREDIBILIDAD FINANCIERO Y ECONOMICO

Fin di maart por spera e resultado di e evaluacion



Tur aña Minister Maduro ta reuni cu ehecutivonan di Standard & Poor's (S&P) riba e evaluacion di nos Pais su situacion financiero y economico. E siman pasa a toca turno na e mandatario pa hunto cu Minister President reuni cu S&P, despues cu S&P a reuni cu diferente departamento di Gobierno y instancia, pa asina por haya un bista con Aruba ta para financieramente y economicamente.

Durante e reunion Minister Maduro y Minister President, a brinda informacion riba, entre otro, e trabounan cu ta tumando luga den cuadro di e Landspakket acorda cu Hulanda, e cambionan fiscal reciente, e relacion cu Hulanda pa locual ta



trata COHO y RAFT, y e supervision financiero di CAFT.

Mester remarca cu a 'prima vista', S&P ta satisfecho pa mira con Aruba ta recuperando despues di e pandemia y tur locual a wordo haci pa asina por mantene e credibilidad financiero di nos Pais.

Minister Maduro ta gradici tur stakeholders pa nan input balioso pa e evaluacion di Aruba y ta gradici e team di S&P pa nan trabou dedica y nan bon cooperacion di semper pa Aruba. Fin di maart por spera e resultado di e evaluacion.



Ursell Arends
MINISTER



PALET BLANCO TAMBE TA CONSIDERA COMO "GREEN WASTE" Y TIN UZO PA AGRICULTURA

Anteriormente a enfoca ariba Green Waste, cual ta blachi, taki, troncon di mata. Pero bo tabata sa cu palo en general – si e ta limpi di pesticida – por wordo uza pa agricultura?

Con ta distingui e diferente desperdicio di palo y palet blanco?

Tin diferente tipo di palet, primordialmente esnan cu ta "treated" (cu pesticida), y esnan cu ta "non-treated" (sin pesticida).

Como resultado, paletnan blaww (treated) por wordo uza di nobo den fleta, pero paletnan blanco si NO mag wordo exporta di nobo – sin ricibi ningun tratamiento. E diferencia ta cu paletnan trata cu pesticida, of palet blaww, ta preveni contra exportacion di pester indesea, por ehempel comehein.

Ta importante pa e palo ta "non-treated", sin pesticida of ningun tipo di vernis, si ta desea pa uza esaki den agricultura. Motibo pa esaki ta cu e palo lo wordo kibra na pidanan chikito, y asina uza como "mulch" pa agricultura, of tambe por wordo inclui como un elemento den compost pa mata – y lo ser duna na sector agricultural gratuitamente. No ta faborabel pa insecticida, pesticida of otro kimiconan penetra nos tera pa via di un maneho irresponsabel.

Unda pa entrega palet?


Companionan cu ta scoge pa spaar placa y separa e diferente tipo di palet (of palo) por haci esaki na e siguiente forma:

- Desperdicio organico di mata, palo of palet blanco por entrega na Johnsons of Ecotech Freezone.
- Pa uzo residencial, entrega di Green Waste ta gratis na Ecotech Freezone condicional cu ta ricibi esaki sortia y limpi di tur otro tipo di desperdicio.
- Pa uzo comercial, tin un prijs preferencial pa green waste sortia y limpi.
- Pa tur desperdicio cu ricibi sin sortia, of si acaso e palo no ta limpi, lo ser cobra na e prijs regular.




E beneficio di separa e tipo di desperdicio aki ta cu como compania cu ta entrega esaki por spaar placa ora di hiba paso e desperdicio ta wordo considera "limpi". Unabes cu e desperdicio ta combina y no separa e labor pa por procesa esaki debidamente ta bira mas intensivo y esaki ta resulta den un prijs mas halto.

Pa mas informacion tocante desperdicio di palo por bishita website www.trashtocasharuba.org pa asina haya un bista di e Blue Print pa maneho di desperdicio.



RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)

Bo ta di acuerdo cu mester cambia e manera di anda cu bo desperdicio?

NO, Mi ta scoge pa sigui cu Serlimar of Ecotech pa recohe mi desperdicio.
*e opcion aki no tin cambio di prijs

SI, Mi ta scoge pa haci algun cambio den mi cas/negoshi.
*e opcion aki lo por tin cambio di prijs, algun ta pornada, algun pa un prijs chikito y algun bo ta haya placa a cambio.

Un gran parti di mi desperdicio lo wordo procesa pa poni den bales y deposita na Sero Teishi

Bo opcion pa cada tipo di desperdicio:

PLASTIC	PLASTIC BEACH PARTY	ARUPRO	ECOTECH FREEZONE	
GLASS	ROMAR TRADING	BALASHI BREWERY	PALMERA	ARUBA HEATHOT SAUCES
CARTON/PAPEL	ECOTECH FREEZONE	ICR SERVICES		
GREEN WASTE/PALLET BLANCO	JOHNSONS	ECOTECH FREEZONE		
VEHICULO, METAL, E-WASTE Y "WHITE GOODS"	DALTRA	ICR SERVICES	Esaki ta inclui productionan manera frigidaire, aircro, computers, etc	
BATERIA DI AUTO	DALTRA	CARENTRA		
AZETA DI MOTOR, HYDROLIC Y GEAR	DALTRA	CARENTRA		
TAIRA	ECOTECH FREEZONE	CARENTRA		

Bo kier haci mas?

Si.

Reuza mas tanto posibel

Minimalisa bo cantidad di desperdicio

Cumpli cu ley "Milieu schadelijke Producten"

DUMP ILEGAL/MONDI

PARKIETENBOS

SERO TEISHI

INCINERA

RECICLA

REUZA

MINIMALISA

PREVENI


PROHIBI

MENOS PREFERA

RECONOCE BO IMPACTO

MAS PREFERA

E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad, Naturala y Asuntonan di Adulto Mayor

"Nada no ta cambia, si nada no cambia!
Reconoce bo impacto, un Aruba dushi ta un Aruba cu nos por maneha nos sushi!"
Minister Ursell Arends

www.trashtocasharuba.org



MINISTER ENDY CROES A PRESENCIA E FIRMAMENTO DI E MOU PA PROYECTO DI EMBEYECIMIENTO DI EAGLE BEACH STRIP



Diamars anochi, den un esfuera ameno na La Cabana Ballroom, Gobierno di Aruba a firma un MOU cu Tourism Product Enhancement Fund (TPEF) y sector priva den cuadro di e mehoracion di nos producto Aruba. E proyecto ta wordo financia pa TPEF y Aruba Tourism Authority (ATA). Ta trata di un colaboracion unda cu TPEF lo haci e inversion y e hotelnan riba e strip lo percursa pa e mantencion pa tanto nos local y bishitantenan y asina hunto nos por eleva producto Aruba. E proyecto di embeyecemento di e strip di Eagle Beach ta cuminsa for di e retonde di Amsterdam Manor te cu e retonde di Alhambra.

Minister Endy Croes ta felicita colega Minister Dangui Oduber y Ministerio di Turismo, TPEF y tur stakeholders pa cu e bunita



proyecto. Tambe e mandatario ta gradici e hotelnan pa e bunita colaboracion na bienestar di nos pais, hunto nos por logra mas.

MINISTER ENDY CROES TA AMPLIA RIBA E TOPICO DI “STUDIEFINANCIERING” ENTRE PAISNAN DEN REINO

Minister Endy Croes a atende un conferencia na Curaçao cu ta carga cu puntonan di agenda entre Ministernan di Reino di Enseñansa di Aruba, Curaçao, Hulanda y Sint Maarten. Un di e puntonan di agenda ta regarda “studiefinanciering”.

STUDIEFINANCIERING:

Hulanda ta propone pa nos investiga hunto pa purba yega na un sistema automatisa, unda por intercambia informacion cu Belastingdienst y Dienst Uitvoering Onderwijs (DUO) Hulanda. Asina por verifica na un manera facil informacion di e estudiante y mayornan na un forma mas eficiente y no mester warda mas riba e “draagkrachtaanvraag” cu ta encera documentonan di Departamento di Impuesto cu mester wordo manda Hulanda. A traves di un sistema asina, DUO Hulanda por mira mesora si un estudiante por bin na remarke pa e prestamo na un manera mucho mas rapido.

Pa e studentenan cu a haci un prestamo y kisas no ta pagando bek, un sistema asina mes lo por haci calculacion di informacion ricibi di Departamento di Impuesto, si mester ahusta of baha e suma cu e estudiante mester paga bek y/of haci pago den un termino mas largo den caso cu e entrada no ta suficiente pa cubri e suma halto. Sinembargo, asuntonan cu ta regarda Departamento di Impuesto ta cay bou di un otro Ministerio, pues Minister di Enseñansa di Aruba no ta autorisa pa debati of tuma decision riba e topico aki. Parlamento di Aruba tin un rol grandi den esaki.

Tin 3 punto di interes primordial pa e caminda cu Hulanda kier trata di cana. (1) Un base legal den wetgeving di Europees Nederland, pa asina DUO por ricibi informacion y por traha riba nan. (2) Un base legal den wetgeving di Aruba, Curaçao y Sint Maarten pa por intercambia informacion. (3) Un manera mas sigur pa por intercambia informacion conforme exigencia di Algemene Verordening Gegevensbescherming (AVG). Hulanda na final ta den buskeda di informacion di studentenan di Aruba Curaçao y Sint Maarten cu no a cumpli of no ta pagando nan prestamo y pa e motibo aki tambe kier intensiva cu basenan legal pa por haya e personanan aki mas facil.



Riba e plataforma aki deseabel ta pa hasi un compromiso cu lo investiga prome tur posibilidad pa yega na locual ta nan pensamiento encuentro Studiefinanciering. Tin debatenan cu lo continua den oranan nos dilanti referente e tema aki. Concluyendo Minister Endy Croes a enfatisa cu e ta un reunion cu ta carga cu puntonan di agenda di interes.



**Nos turismo stayover a
recupera 98.4% den Aña 2022 vs
Aña 2019.**

UN RESULTADO EXCEPCIONAL!

PABIEN ARUBA



Openbaar Ministerie Aruba:

CARTA DI REACCION DI OM PA DOWERS Y DE MEZA

Ayera 17 di januari ultimo miembronan di Parlamento A.L. Dowers y M.E. de Meza a entrega un carta na Ministerio Publico, den cual e pregunta a bin dilanti si premier di Aruba a haci denuncia relaciona cu supuesto irregularidadnan na Arubahuis.

Den nan carta a muestra tambe riba e overbruggingstoelage di cual e minister plenipotenciario anterior aparentemente ta haci uso, y a tilda e premier di abuso di poder.

Ministerio Publico a reacciona riba e carta awemainta y a confirma cu e premier a haci denuncia relaciona cu irregularidadnan na Arubahuis.

Pa loke ta e overbruggingstoelage y e supuesto abuso di poder Ministerio Publico a referi na e areglo legal cu tin.

En conexon cu e atencion di parti di media cu tabatin ayera, Ministerio Publico a dicidi pa publica e reaccion aki riba señores Dowers y De Meza den e relato di prensa aki.



Departamento di Impuesto:

E FORMULARIONAN DIGITAL DI E IMPUESTONAN MENSUAL LO TA DISPONIBEL DEN 'BOI' ENTRANTE 31 DI JANUARI 2023

Nos ta actualisando nos sistema di declaracion di impuesto cu e ultimo cambionan di e Plan di Impuesto 2023.

Pa e motibo aki e declaracionnan digital di luna di januari 2023 di BBO/BAVP/BAZV, loonbelasting y otro impuestonan mensual lo ta disponibel riba nos portal 'BO impuesto' entrante **31 di januari 2023**.

Ta importante pa menciona cu e fecha final pa haci declaracion di impuestonan mensual di luna di januari ta 15 di februari 2023.

Pa mas informacion: consulta www.impuesto.aw, mail nos na boi@impuesto.aw of yama nos na 5227437.

Informacion di nos fechanan final:

<https://www.impuesto.aw/deadlines>






Historia di nos pais
a demostra con mas
fuerte nos por ta, si nos Uni.
Diferencia di opinion por t'ey,
contal cu semper tin respet.
Y irespecto e diferencia
di opinion, ora ta trata
di ARUBA, mas uni nos ta,
mas fuerte ARUBA ta.

Den 2023, Ban uni
pa enfrenta e retonan hunto,
y pa carga e exito hunto.
Uni nos lo atende cu e
retonan nobo pa crea
solucion, oportunidad
y un base solido
pa progreso y felicidad
pa un y tur den
nos comunidad.

**UNION A
DEMOSTRA CON
MAS FUERTE NOS
POR TA PA
CARGA E EXITO
DI NOS PAIS!**



—AÑA DI UNION Y POSITIVISMO!—

